

Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq  
Medlem af Naalakkersuisut for Kultur, Uddannelse, Forskning og Kirke

Inatsisartunut ilaasortaq  
Juliane Henningsen



Inuit Ataqtigiit

### **§ 36 naapertorlugu Kalaallit Danmarkimi ilinniartut angallannermut aningaasartuutaat pillugit apeqqummut nr. 2009-162-imut akissut**

Inatsisartut suleriaasianni § 36, imm. 1 naapertorlugu 25. november 2009-mi Naalakkersuisunut ima apeqquqteqarputit:

**Nunatsinnit Danmarkimut ilinniariartut, ilinniartut danskit assigalugit, Nunatsinnit ilinniarnersiutisarnertik aqqutigalugu, danskit ilinniarnersiutigigitaanut SU-tut taaneqartartup sunniutigisartagaanut naleqqersuusinnaangorlugu, taamaalillutillu ilinniartut atugassarititaasunik pitsaanerusunik angusaqarsinnaanerat anguniarlugu Naalakkersuisut suliniuteqalersaarpat?**

**Akissut:** Ilumoorpoq Danmarkimi ilinniartut Namminersorlutik Oqartussanit ilinniagaqarnersiuteqartut ilinniartutut allatulli SU-sisartutulli angallannermut akikillisaavigineqarnissamut periarfissaqanngimmata. Tamatumunnga tunuliaqutaavoq angallannermut akikillisaasarneq pillugu inatsimmi aalajangersagaqarnera ilinniartut SU-mut qinnuteqarsimangitsut akikillisaavigineqarsinnaatitaannginnerannik.

Ilinniagaqarnersiutit pillugit peqqussutip kingullermik aqqiivigineqarnerani ilaatigut angallannermut tapiissutit peerneqarput ilinniartullu taarsigassarsinissamut periarfissagissaarnerulernerannik taarserneqarlutik. Ajornartorsiut taanna arlaleriarlugu eqqartorneqartarsimavoq, kingullermik 15. april 2009-mi ilinniagaqarnersiutit pillugit isumasioqatigiinnermi ilinniartut kattuffiisa KIK-p, Avalaap Kisallu peqataaffigisaannik. Taamani Avalammit kissaatigineqarpoq angallannermut atuakkanullu tapiissutit atuutileqqissasut. Tamanna taarsigassarsinissamut periarfissat pitsaanerulernerisigut atuagarsinermut aningaasartuutit angallannermullu aningaasartuutitut matussusiinissamut naammannginneranik tungavilersuuserneqarpoq. Oqaatigineqassaaq ilinniartut kattuffiisa 2010-mi januaarimi ataatsimeeqatigineqarnissaat isumaqatigiissutigineqarlunilu pilersaarutaammat, tassani ilinniagaqarnersiutit pillugit nalunaarut atuuttoq iluarsaanissaq siunertaralugu eqqartorneqassalluni.

28. december 2009  
Sags nr. 2007-003194  
Dok.nr. 283258

Postboks 1029  
3900 Nuuk  
Tlf: +299 345000  
Fax: +299 322073  
Email: kiiip@gh.gl

Angallannermut tapiissutisisinnaanerup atuuteqqilernissaa Avalammit kissaatigineqartorujussuummat apeqqut ilinniagaqarnersiutit pillugit nalunaarutip iluarsaanneqarnerani ilanngunneqassagunarluinnarpoq.

Ilinniagaqarnersiuteqartitsiviup aamma Danmarkimi Kalaallit Illuinit kaammattorneqarnikkut siusinnerusukkut ilinniartut Namminersorlutik Oqartussanit ilinniagaqarnersiuteqartinneqartut SU-mit akikillisaavigineqarsinnaanerat misissorsimavaa. SU Styrelsemi 2006-imi ataatsimiittoqarpoq.

Ataatsimiinnermi nalunaarutigineqarpoq kalaallit ilinniartut angallannermut akikillisaavigineqarsinnaassappata inatsit allanngortinneqartariaqassasoq, kiisalu inuit taama ikitsigisut pissutigalugit inatsisip allanngortinneqarnissaa Undervisningsministeriaqarfiup peqataaffigiumassagunangikkaa, tassami kalaallit ilinniartut inuusuttut ilinniarfianniittut akikillisaavigineqarsinnaareemata. Taamaattumik ilinniarfiitaanerni ingerlaqqiffiusuni ilinniartut kisimik angallannermut akikillisaavigineqarsinnaanngillat.

Taamaattumik Danmarkimi ilinniarfiitaanerni ingerlaqqiffiusuni ilinniartut aningaasaqarnikkut ikiorserneqassappata tamatuma Namminersorlutik Oqartussanit aaqinneqartariaqarnera inerniliunneqartariaqarpoq. Bussinut qimuttuitsunullu kortinut tapiissuteqartoqaqqilerpat tamanna aningaasaqarnikkut kinguneqarujussuassaaq. Tapiissutit 2005-imi peerneqarmata ukiumut aningaasartuutit 54.000,00 kr.-iupput.

Taamaattumik ilinniagaqarnersiutit pillugit nalunaarummik atuuttumik iluarsaannermut atatillugu najugarisami ilinniarfigisamut 5 km-erini ungasinnerusumilluunniit ungasitsigitillugu Naalakkersuisut Kalaallit Nunaata avataani ilinniartunut bussinut qimuttuitsunullu kortinut tapiissuteqartarnerusimasumik atuutilersitseqqinnissaq misissorsulugulu isumaliutiginiarpaat. Allassimasutut bussinut qimuttuitsunullu kortinut tapiissuteqaqqittalerneq aningaasaqarnikkut kinguneqarujussuartaavooq ilinniartumullu pineqartumut pingaarutilerujussuussalluni.

Inussiarnersumik inuulluaqqusillunga

Mimi Karlsen